



Sesida dals

21 d'avrigl 2020

Communitgà ils

23 d'avrigl 2020

Protocol nr.

336

Incumbensa Widmer (Favugn)

concernent la flexibilisaziun dal dumber da lecziuns per mez di sin il stgalim primar

Resposta da la Regenza

En l'Ordinaziun tar la Lescha da scola (Ordinaziun da scola; DG 421.010) èsi fixà en l'art. 23 al. 1 ch'i èn admissiblas per regla maximalmain 4 lecziuns per mez di sin il stgalim primar. La finamira da questa directiva è quella d'accordar l'instrucziun en moda optimala cun ils basegns e cun las capacitads da las scolaras e dals scolars (SeS) dal stgalim primar e da cuntanscher ina buna ritmisaziun dal di da scola resp. da l'emna da scola. Las 5 lecziuns per mez di pretendidas en l'incumbensa stattan en cuntradicziun cun quests aspects pedagogics e didactics. Ils ultims onns èn ultra da quai cumparids studis che crititgeschan in cumenzament da scola la damaun marvegli, perquai che la prontezza da recepir e las capacitads dals SeS èn manglusas (p.ex. prof. dr. Lemola, Universidad da Basilea). Ma er per las personas d'instrucziun resultass ina chargia da lavur betg equilibrada, perquai ch'ellas avessan savens liber il suentermezdi.

Per 4 lecziuns per mez di sin il stgalim primar vegn duvrà – inclusiv pausas – in temp total da circa 210 minutas. Quai corresponda a la durada d'in mez di en la scolina da circa 210 minutas temp d'instrucziun e temp da recepziun. In'extensiun dal temp d'instrucziun sin 5 lecziuns per mez di aboliss questa parallelisaziun dal temp d'instrucziun en scolina e sin il stgalim primar e chaschunass novas difficultads organisatoricas per tut ils lieus dal stgalim primar che mainan er ina scolina.

In urari da 5 lecziuns per mez di chaschuna in temp total inclusiv las pausas da circa 260 minutas. Per questa durada stuess l'instrucziun cumenzar il pli tard a las 7.30 e finiss pir a las 12.00. Sch'ins considerescha anc la lunghezza da la via da scola en cas da lieus periferics, poi vegnir constatà ch'ils SeS stuessan bandunar lur dachasa gia a las 7.00 u schizunt pli baud e fissan pir vers las 12.30 puspè da return.

L'avantmezdi daventass fitg lung per ils SeS, e quai pudess chaschunar ina surchargia. Il temp da mezdi cuminaivel cun la famiglia vegniss restrenschi.

Pervia dal dumber da lecziuns obligatoricas en las singulas classas dal stgalim primar resultassan il suentermezdi blocs da mo 1 lecziun u da 2 lecziuns, e quai chaschunass alura in temp da tgira e da surveglianza supplementar cun custs correspondents. L'emprima classa primara avess ultra da quai adina liber il suentermezdi.

Las tavlas da lecziuns chantunalas èn vegnidas relaschadas da la Regenza. Per ils purtaders da scola furman ellas la basa per concepìr ils uraris dals SeS e da las personas d'instrucziun. Il spustament da la competenza da far las tavlas da lecziuns dal chantun sin ils singuls purtaders da scola sco ch'i vegn proponì en l'incumbensa, na po betg succeder, perquai ch'i ston vegnir previssas las medemas dotaziuns en ils singuls roms per cuntanscher las competenzas tenor il Plan d'instrucziun 21. Mo uschia poi vegnir segirà ch'ina qualitad da scola cumparegliabla po vegnir garantida en tut las vischnancas dal chantun per realisar l'egualitad da las schanzas per tut ils SeS.

La Lescha davart las scolas popularas dal chantun Grischun (Lescha da scola; DG 421.000) e l'Ordinaziun da scola fan prescripziuns generalas. Ma ellas porschan als purtaders da scola la pussaivladad d'inoltrar dumondas per permissiuns excepziunalas a l'Uffizi per la scola populara ed il sport en situaziuns spezialas. La competenza per permetter talas excepziuns sto restar en mintga cas tar il chantun. Grazia a questa pratica cumprovada èn vegnidas dumandadas mo paucas permissiuns excepziunalas en il passà, en emprima lingia da scolas pitschnas. En collavuraziun tranter l'Inspecturat da scola ed il purtader da scola ha pudì vegnir concedida per regla ina permissiun che tegna quint dal lieu e da la situaziun.

Sa basond sin questas explicaziuns propona la Regenza al Cussegl grond da refusar questa incumbensa.



En num da la Regenza

Il president:

Dr. Chr. Rathgeb

Il cancellier:

Daniel Spadin